

**POR T VILA
VANUATU GOVERNMENT**


The Constitution Building, Lini Highway, PMB 9012 Port Vila
All general enquiries contact Tel: 67824573 Fax: 678 24574

Email: vatqueries@vanuatu.gov.vu

Web: <http://customsinlandrevenue.gov.vu>



VAT, Travel mo Turism



Ol seksen insaed long buklet ia Peij

A Festok	3
Valiu Aded Takis - Wanem ia?	3
Olsem wanem VAT i wok	3

B Rejista long saed blong VAT	4
Hu i mas rejista?	4
Jekem ol takisebol sel	4
Olgeta joen-venja mo kampani we	
oli gat patna insaed	4
Grup blong ol kampani	4
Olgeta riten period	4

C Olgeta eksempsen mo sero-reiting	5
Olgeta eksempsen	5
Sero-reiting	5

D Olgeta ekwipmen mo rikod	5
Olgeta ekwipmen	5
Olgeta rikod blong pruvum VAT	5

E Olgeta invois	6
Olgeta takis invois	6
Olgeta invois we man we ipem guds o sevis i mekem	6

F Olgeta kredit not mo debit not	7
---	---

G Olgeta pasenja we oli travel i kam insaed mo go aot long kaontri	7
Travel i go aot long kaontri	7
Travel i kam insaed long kaontri	8

Ol seksen insaed long buklet ia Peij

H Olgeta travel ejen	8
Olgeta travelas jek	8
Olgeta travel insurens	8
Ol sel we oli tekemples bifo 1 Julae 1998	8
Olgeta fi we kampani i jasem taem man i kanselem tikit	8
Olgeta diskaoon	9
Olgeta peimen	9
Olgetavaoja	10

I Olgeta tua opereita we oli dil wetem ol pipol we oli flae i kam insaed long kaontri	10
Olgeta sel insaed long Vanuatu	10
Olgeta ovasi maketing kost	11
Olgeta promosenal fand	11

J Olgeta jeneral sel ejen	11
----------------------------------	----

K Pasenja transpot	11
Ea mo si transpot	11
Intenasonal	11
kampani blong rentem trak	12
Ol fi long saed blong buking	12
Olgeta ekses	12

L Akamodeisen	12
Jeneral	12
Taem blong saplae	12
Jasem VAT	13

M Olgeta narafala samting	13
Kredit kad	13
Olgeta samting we oli pem long diuti fri	13
Blong moa infomeisen o help	13

A Festok

Buklet ia i kamaot festaem long manis Mei 1998 mo oli rivium o mekem sam jenis long hem bakegen long Oktoba 2005. Eni jenis we i tekem ples afta long Oktoba 2005 bae i no stap insaed long buklet ia.

Valiu Aded Takis - Wanem ia?

VAT hemi takis we i aplae long ol mane we man i spendem. Hemi tru se las man we i yusum guds mo sevis nao i mas pem takis ia mo hemi kamaot blong mekem se takis we Gavman i jasem long ol mane we pipol oli spendem hemi semak mo hemi fea long evriwan. Hemi no wan takis we ol man we oli salem ol guds mo sevis oli mas pem. Olgeta oli stap nomo blong kolektem takis ia long bihav blong Gavman.

Takis ia bambae i aplae long evri kaen guds mo sevis nomata sipos Gavman, wan bisnis o wan non-profit oganaeseisen i saplaem. Hemi no wan takis we i kavremap ol profit mekem se Gavman i no wari tumas long hamas profit i stap kamaot long ol guds o sevis we yu saplaem.

Dipatmen blong Kastoms mo Inlan Reveniu (DKIR) bambae i kolektem VAT long wan reit nomo (hemia 12.5%) long kolosap evri gud mo sevis we oli salem long prodaksen mo distribuisen jen. Be long saed blong olgeta we oli stap prodiusim, distributim mo salem olgeta guds mo sevis, bambae oli save mekem kleim blong VAT we oli spendem long olgeta kost mo pejes blong bisnis blong olgeta.

Hemia i minim se VAT bambae i no mekem ol bisnis oli pem moa takis. Las man nomo long laen we hemi pem guds o sevis be hemi no salem bak o hemi no prosesem bakegen we bambae hemi pem takis ia mo hemi no save mekem kleim from VAT bakegen.

Be long narasaed long hem olgeta konsuma bambae oli laki long saed we VAT bambae hemi daonem olgeta kastom diuti mo bambae hemi stopem tenova mo sevis takis. Gavman

hemi statem blong putum VAT from se hemi wantem jenisim takis sistem folem Komprihensiv Rifom Program (KRP).

Folem loa, kolosap evri bisnis we oli involv long travel mo turism industri oli mas rejista long saed blong VAT mo bambae i mekem se oli gat ol niufala laeabiliti mo responsibiliti.

Stamba tingting blong buklet ia hemi blong eksplenem olsem wanem bambae VAT i afektem ol pipol we oli involv long travel mo turism industri (i minim hotel industri tu) mo blong givimaot ol spesel infomeisen blong helpem olgeta blong andastandem VAT.

Blong save moa infomeisen long saed blong rejistreisen mo olsem wanem blong pruvum VAT, yu save ridim buklet ia "**VAT - Yu nid blong rejista o no?**". Yu save kontaktem VAT Ofis tu insaed long Dipatmen blong Kastoms mo Inlan Reveniu blong kasem moa infomeisen afta we yu rejista.

Olsem wanem VAT i wok

Hemi tru blong talem se i gat tu wei we VAT i stap wok long hem :

- Wan man we i rejista, olsem wan hotel, i mas pem 12.5% takis long evri guds mo sevis we hemi pem blong yusum long bisnis. Be hemi save kleim from wan kredit long VAT ia we yumi stap singaotem input takis, **hemia i mekem se long end ritela i no pem wan VAT nating.**
- Hotel i kavremap 12.5% VAT long praes blong evri guds mo sevis we hemi salem, mo afta hemi pem amaon ia, we hemi VAT long ol sel/inkam (we hemi aotput takis) maenas (-) VAT long ol ekspenses (we hemi input takis) i go long VAT Ofis insaed long Dipatmen blong Kastoms mo Inlan Reveniu - **hemia i mekem se long end kastoma nao i pem evri mane long saed blong VAT.**

Hemi klia se evri mane we bisnis i pem long saed blong VAT bambae hemi karem bak sapos hemi rejista. Long fasin blong wok, from se wan bisnis we i rejista long saed blong VAT i save kleim from VAT we hemi spendem long ol pejes, i mekem se evri takis ia i go tru long

prodaksen mo distribusen jen, mo las kastoma we i pem guds mo sevis ia nao bambae i pem takis ia.

B Rejista long VAT

Hu i mas rejista

Evri wanwan man, bisnis mo oganaeseisen we oli stap karemaot wan takisebol aktiviti mo oli stap salem olgeta samting we i mas gat takis long hem mo andap long hem oli winim moa long 4 milian Vatu long wan yia oli mas rejista wetem VAT Ofis.

Be olgeta we sel blong olgeta long wan yia hemi no kasem 4 milian Vatu, oli save disaed blong rejista o no rejista long saed blong VAT. Olgeta we oli no rejista bambae yumi tekem se olgeta oli olsem ol las konsuma - hemia i minim se bambae olgeta i no save kolektem VAT mo bambae oli no save mekem kleim from wan kredit long eni VAT we oli pem long ol ekspenses blong olgeta (input takis).

Jekem ol takisebol sel

Blong faenemaot stret sipos yu mas rejista long saed blong VAT o no, yu nid blong jekem gud se wanem nao yu stap salem, hemia i minim se olgeta samting we yu stap salem i mas gat mani blong takis long hem o no.

Kolosap evri bisnis we oli involv long saed blong travel mo turism industri oli stap mekem olgeta takisebol sel, we i minim olgeta sel we oli mekem long taem blong wan komesol aktiviti we oli stap ranem oltaem mo evri dei.

Blong jekem se wanem kaen sel nao bisnis blong yu i stap mekem mo wanem valiu blong hem, yu mas faenemaot sipos sam long olgeta sel ia oli sero-reited o ekseempt. Sipos i gat sam ekseempt sel, yu no save kaontem olgeta insaed long 4 milian Vatu total sel blong yu, hemia taem we yu stap traem blong faenemaot sipos yu mas rejista o no. Be yu mas kavrempa olgeta sero-reited saplae insaed long 4 milian Vatu ia. Bambae i gat moa toktok long saed blong olgeta ekseempt saplae mo sero-reited saplae long nrafala pat blong buklet ia.

Olgeta joen venja mo ol kampani we oli gat patna insaed.

Long saed blong rejistreisen, olgeta kampani o bodi we oli no inkopereitem olgeta yet olsem olgeta patnasip, joen venja mo trasti blong ol trast oli mas rejista long nem blong olgeta nomo be i no long nem blong olgeta memba o sheaholda. Long saed blong olgeta trasti blong wan trast, oli mas rejistarem trast ia long nem blong trast hemwan, trast bambae hemi kam olsem wan bisnis we hemi rejista. Sipos bodi ia hemi rejista, i no nid blong olgeta wanwan memba o sheaholda oli rejista nomata we oli memba blong wan bodi we oli no inkopereitem yet (osem ol patna insaed long wan patnasip) oli gat pesonal responsibiliti long eni obligeisen blong bodi ia we oli no inkopereitem yet.

Grup blong ol kampani

Sipos i gat ol kampani o bodi we oli no inkopereitem yet be sem man o sem pipol oli kontrolem, olgeta i save aplae i kam long VAT Ofis blong oli putum olgeta i kam long wan grup nomo mo tritim olgeta long sem fasin olsem wan grup blong ol kampani. Bambae oli mas jusum wan memba blong hemi ripresentem grup mo blong tekemap responsibiliti blong pruvum VAT long olgeta aktiviti blong evri grup memba. Nomata we wanwan memba ia bambae oli nid blong mas rejista, kipim ol rikod mo givimaot ol takis invois, bambae oli no nid blong mekem ol riten mo pruvum VAT.

Olgeta riten period

Eniwan we bambae hemi rejista long saed blong VAT bambae hemi gat wan riten period blong wan manis o tri manis. Sipos oli luk se tenova blong olgeta bambae hemi moa long 8 milian Vatu long wan yia, bambae oli mas fulmap mo sendem bak ol riten blong olgeta evri manis i kam long VAT Ofis. Be sipos tenova blong olgeta i no go kasem amaon ia, olgeta i gat raet yet blong jusum sipos oli wantem sendem olgeta riten blong olgeta long evri manis o no.

C Olgeta eksempsen mo sero-reiting

Olgeta eksempsen

I gat sam kaen sel we oli ekseempt long VAT. Hemia i minim se oli no pem VAT long olgeta, mo VAT we bisnis hemi pem long ol input long saed blong olgeta ekseempt sel ia bambae hemi no save kleim from wan kredit long olgeta. Hemia nao sam long olgeta guds mo sevis we oli esempt long VAT:

- Olgeta guds mo sevis we oli doneitem mo afta wan non-profit bodi hemi salem bakegen; mo
- Olgeta faenansol sevis; hemia i minim wok blong eksjensem mani o karensi blong givimaot ol jek, postol not, intres peimen, givim olgeta kredit, laef insurens, kontrak mo ritaemen skim, anda raeting brokarej mo wok blong arenjem sam long olgeta samting ia, eksapol, arenjem olgeta mogej;
- Olgeta rent blong ol haos we pipol i silip long hem;
- Olgeta edukeisonal institusen (hemia i inkludim skul fi);

Hemi impoten blong luksave se wan bisnis we hemi stap dil nomo wetem olgeta ekseempt aktiviti hemi no gat eni spesel advantej. Bisnis ia bambae yumi tekem se hemi olsem wan faenal konsuma, we i minim se hemi mas pem ful kost blong VAT long evri input mo ekspenses blong hem.

Eniwan we i rejista mo hemi stap dil wetem olgeta takisebol saplae mo olgeta saplae we oli ekseempt, hemi mas divaedem gud olgeta ekspenses ia blong mekem sua se hemi save kleim from wan kredit long olgeta ekspens we hemi mekem long olgeta takisebol saplae.

Sero-reiting

Nomata we VAT bambae hemi aplae long kolosap long evri sel long wan reit blong 12.5%, i gat sam transaksen we bambae oli sero-reited. Hemia i minim se bambae VAT Ofis hemi jasem VAT long wan reit blong sero pesen, we i minim se i no gat VAT nating oli jasem long wan sel, be input VAT we oli pem long olgeta kost we oli go wetem olgeta transaksen ia bambae oli save kleim from wan kredit long hem.

Olgeta kaen saplae blong ol guds we oli sero-reited mo we yumi save faenem long travel mo turism industri hemi olsem olgeta transpot i go ovasi. Bambae yumi toktok moa long saed ia long wan narafala pat blong buklet ia.

D Olgeta ekwipmen mo rikod

Olgeta ekwipmen

Evri bisnis blong travel we folem loa oli mas rejista long saed blong VAT, oli mas yusum wan kas rejista masin blong rikodem ol sel we oli mekem evri dei long teip blong kas rejista ia. Sipos oli wantem yusum eni narafa wei o masin blong rejisterem kas, oli mas askem apruvol blong VAT Ofis.

Olgeta rikod blong pruvum VAT

Long saed blong ol bisnis we oli rejista long saed blong VAT i gud se oli mas save gud ol rul blong takis ia mo fasin blong fulmap mo sendem ol riten. Bambae hemi no strong nating blong lanem ol niu samting ia.

I gat tu difren wei blong pruvum VAT: I gat **invois beisis**, we i minim se i gat invois long saed blong ol sel mo pejes, mo tu i gat **peimen beisis**, we i minim se i folem ol kas we yu risivim mo mane we yu pemaot.

- **Invois beisis** - Hemia hemi kavremap olgeta bil we yu no pem yet mo olgeta inkam we yu no kolektem yet mo hemi soem wan tru pikja blong faenansol posisen blong bisnis long eni period. Olgeta riten we yu priperem folem invois beisis oli stap pruvum takis we u mas pem long saed blong inkam mo ekpendija long taem we invois hemi kamaot o peimen i tekemples, hemia i dipen long weswan nao i kam fastaem. Hemia i mekem se yu save kleim from wan kredit long VAT we yu pem (**input takis**) stret afta we yu kasem wan invois blong pejes ia, iven sipos oli no mekem eni peimen blong pejes ia yet. Hemia i semak tu long VAT we i kamaot long ol sel (**aotput takis**) we yu mas pem taem we yu givimaot wan invois o risivim

peimen. Hemia i minim se sipos yu no kasem peimen yet yu mas pem VAT folem invois we i stap.

- **Peimen beisis** - Hemia i kavremap olgeta bil we yu bin pem mo inkam we yu bin kasem mo long tufala samting ia nao hemi soem faenansol posisen blong bisnis. Olgeta riten we yu prierem folem peimen beisis oli pruvum VAT long ol sel/inkam (input takis) mo VAT we yu pem long olgeta ekspenses (aotput takis) be long olgeta guds o sevis nomo we yu no mekem peimen yet o risivim peimen blong olgeta yet.

E Olgeta invois

Olgeta takis invois

Bambae yu **no** nidim eni spesel dokumen sipos yu stap salem olgeta guds o sevis i go long ol memba blong jenerol publik be bambae yu nidim wan samting we bambae i pruvum sel ia, olsem rol teip blong wan kas rejista.

Sipos wan man we i rejista i askem blong yu givim wan **Takis Invois** long hem folem sel blong guds mo sevis, yu mas givim long hem. Long kaen keis olsem ia ol rul ia nao oli aplae:

- I no nid blong givim wan **takis invois** sipos amaon blong sel i no kasem 5,000 Vatu be yu mas pruvum sel blong yu long olgeta wetem wan teip blong kas rejista o wan risit;
- Sipos amaon blong sel i ova long 5,000 Vatu (VAT i stap insaed tu), takis invois i mas soem ol samting ia:

- ⇒ toktok ia Takis Invois long wan klia ples;
- ⇒ wan serial namba blong invois;
- ⇒ nem, CT namba mo adres blong saplaea;
- ⇒ nem blong man we i risivim saplae;
- ⇒ deit;
- ⇒ kwantiti o volium blong ol guds o sevis we yu saplaem;
- ⇒ wan smol storian abaot ol guds mo sevis we yu saplaem;

⇒ i save gat praes we i gat VAT insaed o wan steitmen se hemi kavremap wan fi blong takis; o totol amaan blong takis, praes we i no gat VAT insaed mo praes we i gat VAT insaed.

Rimemba: Eniwan we i rejista i mas kipim oltaem olgeta takis invois we hemi kasem blong hemi save yusum blong sapotem kleim blong hem from VAT we hemi pem long olgeta ekspenses (input takis kredit). Ino nid blong sendem olgeta invois ia i kam long VAT Ofis wetem wanwan riten we yu stap sendem be yu mas kipim olgeta i stap long sef ples insaed long bisnis blong yu mo redi blong soem long ol wokman blong VAT Ofis taem oli mekem wan inspeksen o sipos oli wantem mekem wok blong Odit. Hemia impoten se yu mas kipim olgeta VAT rikod blong yu long wan period blong sikis yia. Yu mas askem apruvol blong Daerekta sipos yu wantem kipim ol rikod blong yu ovasi.

Olgeta invois we man we i pem guds o sevis i mekem

Samtaem wan ejen hemi pem mo salem ol guds mo sevis long bihav blong wan narafala man (we hemi prinsipol). Long ples ia bambae prinsipol nao hemi man we hemi pem o salem guds mo sevis, be ino ejen.

Sipos prinsipol mo ejen tufala tugeta i rejista long saed blong VAT, ejen hemi save givim wan takis invois (o debit o kredit not) long bihav blong prinsipol. Ejen hemi nid blong givimaot takis invois ia long nem blong hem nomo be i no nid blong ejen i putum nem blong prinsipol long takis invois ia. Hemia i mekem se prinsipol hemi no save givimaot wan takis invois blong sem saplaea tu.

Hemia impoten se yu mas askem fastaem long Daerekta blong Kastoms mo Inlan Reveniu bifo yu save givimaot mo mekem ol kaen invois olsem ia, we i minim se blong tritim wan dokumen we man we i pem ol guds mo sevis nao hemi mekem we we i pruvum sel olsem wan takis invois nomata we saplaea hemi no givimaot invois ia. Daerekta blong Kastoms mo Inlan Reveniu i save givim apruvol blong hem folem wan guds o sevis o kategori blong ol guds o sevis we narafala man

hemi kasem o folem wan saplae o kategori blong ol saplae.

Long taem olsem ia yu mas mekem sua se yu folem olgeta kondisen ia:

- Yu mas kasem apruvol blong Daerekta **fastaem** bifo yu save givimaot ol kaen takis invois olsem ia;
- Man we hemi saplaem guds o sevis mo man we hemi risivim guds o sevis ia **tufala i mas agri** se saplaea bambae hemi **no** givimaot wan narafala takis invois from sem samting ia;
- Evri taem i mas gat **tu kopi** blong kaen takis invois olsem ia we wan kopi bambae saplaea mo narafala kopi man we i risivim guds o saplaea hemi kipim.

Long plante yia i pas i gat wan sistem we olgeta long travel industri oli stap folem blong ranem ol wok bitwin ol travel ejen mo olgeta we oli stap saplaem olgeta turist sevis mo prodak. Prinsipol saplaea blong sevis hemi karem mane we hemi risivim long kastoma mo hemi pem travel ejen long hem from sevis we hemi mekem, hemia i minim se komisen blong ejen hemi pat blong tarif strakja mo hemi no wan narafala kost nomo we kastoma i mas pem bakegen.

Long plante kes olgeta travel ejen oli no stap givimaot ol invois folem olgeta komisen we oli stap jajem long prinsipol saplaea. Long nomol fasin blong wok, bambae komisen we prinsipol saplaea i mas pem i go long ejen hemi stap long pepa o invois we prinsipol hemi prodiusim. Long olgeta wok we i tekem ples bitwin olgeta ejen mo kampani we oli stap salem ol tikit from olgeta sevis (olsem Vanair) hamas mane we bambae oli mas pem olsem komisen hemi stap oltaem long olgeta riten we ejen hemi prodiusim long pepa blong saplaea mo givim long saplaea long ol stret period blong hem.

Dipatmen blong Kastoms mo Inlan Reveniu i save apruvum blong wan man hemi yusum olgeta kaen invois olsem ia we man i pem guds o sevis i mekem, hemia blong olgeta komisen we olgeta travel ejen oli stap jasem long Air Vanuatu, olgeta hotel, motel mo kampani blong rentem trak o moto.

F Ol kredit not mo debit not

Plante taem bambae olgeta debit mo kredit not oli kamaot nomo from se i gat ol mistek, o praes hemi jenis, o wan man hemi tekem bak olgeta guds we hemi bin pem fastaem, o from wan man hemi kanselem tikit we hemi pem finis.

Sipos yu stap givimaot wan kredit o debit not blong ajastem wan samting long sem takisebol period we orijinol invois i kamaot long hem, bambae yu mas mekem ajasmen ia long VAT riten blong yu blong period ia. Eni mistek o ajasmen we i nid blong mekem be takisebol period blong hem i pas finis, bambae yu mas mekem nomo long VAT riten blong period we yu mekem ajasmen ia long hem, hemia i minim se i no nid blong sendem wan narafala riten blong period ia we i gat ol jenis long hem taem we saplae o pejes ia i bin tekemples finis.

Olgeta kredit not i mas soem olgeta samting ia:

- Toktok ia “Kredit Not” long wan klia ples;
- Nem o bisnis nem mo rejistreisen namba blong saplaea;
- Nem blong man we i risivim saplae;
- Deit we oli givimaot kredit not;
- Smol storian blong talem from wanem oli givimaot kredit not; mo
- Amaon long ajasmen long takis we yu mekem; mo
- Deit we yu givimaot kredit o debit not ia long hem.

G Travel i kam insaed mo go aot long kaontri

Travel i go aot long kaontri

- Wok blong transpotem olgeta pasenja i go aot long Vanuatu hemi sero-reited, hemia i minim se kampani i no save jasem VAT long kastoma long eni prodak blong travel i go aot long kaontri olsem fea blong plen o sip.
- Be eni guds mo pesonel samting we man hemi pem long Vanuatu mo

tekemaot long kaontri bambae oli no ekseempt long VAT hemia i minim se bambae i no save gat rifan blong VAT long hem.

Travel i kam insaed long kaontri

Wok blong transpotem olgeta pasenja i kam insaed long Vanuatu hemi sero-reited tu, hemia sipos Vanuatu hemi las ples we bambae man ia hemi go daon long hem mo stap long hem. Be taem we man ia hemi stap insaed long Vanuatu bambae oli jasem VAT long evri guds mo sevis we hemi yusum long Vanuatu.

Olgeta kastoms konsesen we oli aplaem long olgeta bokis mo han bag wetem olgeta pesonel samting we olgeta pasenja blong plen mo sip oli karem i kam insaed long Vanuatu bambae VAT hemi aplae long olgeta tu. (Blong kasem moa infomeisen yu save ridim buklet ia we taetol blong hem hemi “*VAT wetem olgeta Impota mo Ekspota*”)

H Olgeta travel ejen

Festok

Olgeta travel ejen oli stap givim wan sevis taem oli mekem olgeta buking, kolektem peimen mo ol nrafala wok bakegen. Oli stap saplaem sevis ia i go long olgeta hotel, ealaen, kampani blong rentem trak mo moto, mo plante nrafala ples moa mo ejen hemi stap askem blong olgeta i mas pem wan komisen from sevis we hemi mekem. Be bambae komisen ia hemi sero-reited long saed blong VAT sipos prodak we hemi stap saplaem hemi esempt o sero-reited prodak tu. Olsem wok blong arenjem wan tikit blong wan ealaen blong ovasi.

Olgeta defren kaen sel

Olgeta travelas jek

Olgeta travelas jek oli kam anda long faenansol sevis mo oli ekseempt long VAT, hemia i minim se eni wan we i stap travel i no nid blong hemi pem VAT taem hemi pem olgeta travelas jek mo i no nid tu blong wan

ejen i pem VAT long komisen we hemi kasem long kaen sel olsem ia. Sipos i gat wan ejen we hemi no stap givimaot olgeta travelas jek nomo be hemi stap arenjem tu ol nrafala travel prodak mo sevis olsem ol hotel, tikit blong plen, trak o moto blong rentem, mo samfala samting moa, olgeta fi oli mas separat.

Olgeta ajasmen we i nid blong mekem taem we wan we hemi rejista hemi stap saplaem olgeta guds o sevis we oli ekseempt mo olgeta we takis i kavremap olgeta yumi tokabaot finis long sekseen ia we taetol blong hem hemi “Olgeta eksempsen mo sero-reiting”.

Travel insurens

Olgeta komisen we ejen hemi kasem long saed blong ol sel blong travel insurens polisi bambae oli **no** sero-reited mo hemia i minim se VAT bambae i kavremap olgeta long nomol reit blong hem.

Olgeta fi we kampani i jasem taem man i kanselem tikit

Eni fi we kampani hemi jasem from man hemi kanselem tikit blong hem, bambae i mas gat VAT long hem long festaem we fi ia i stap long invois we kastoma i kasem, o long deit we hemi pem fi ia long hem. Hemia bambae hemi deit we hemi bin pem fi ia long hem o deit we kampani hemi tekemaot fi ia long hem long eni fan we ejen o saplaea hemi kipim i stap long bihav blong kastoma.

Olgeta diskao

Amaon blong mane we kastoma hemi pem from olgeta travel guds o sevis we i gat diskao long hem bambae oltaem hemi diskao praes, mo kastoma i mas pem VAT (sipos i gat) folem diskao praes.

Olgeta peimen

- **Pat-peimen/deposit**

Saplaea i pruvum VAT long invois beisis

Taem we wan man hemi mekem wan VAT peimen, eksapol blong bukim wan rum long wan motel o blong kavremap wan kanseleisen fi, taem blong saplae blong ful sevis ia i tekem ples finis. Hemia i minim se, pat peimen ia, hemia sipos oli pem i go long wan ejen o i go daerek long saplaea, i soem se saplaea i mas pem VAT long ful valiu blong sevis ia i go long VAT Ofis long period we man ia i mekem pat-peimen ia long hem. Sipos man ia hemi mekem pat-peimen ia i go long wan ejen, ejen ia i mas talemaot kwiktaem long saplaea blong letem hem i save se hemi mas mekem ol responsibili blong hem. Ifekt blong samting ia hemi olsem ia se ol saplaea oli save responsibol blong pem VAT long olgeta sevis we bambae man ia hemi no yusum o pem long plante manis yet i kam.

Saplaea hemi pruvum VAT long peimen beisis

Long keis olsem ia, taem we ejen o saplaea hemi risivim wan pat-peimen bambae i mekem se bambae hemi mas pem long semtaem ia VAT long amaon blong pat-peimen ia. Bambae hemi jes pem balens blong amaon ia taem we hemi kasem ful peimen blong saplae.

- **Ful peimen**

Peimen i go long saplaea bifo hemi saplaem sevis

Sipos wan kastoma hemi pem ejen fastaem, mo ejen ia hemi pem saplaea bifo saplaea hemi givimaot sevis ia, hemi nid blong ejen i givim wan takis invois long saplaea folem komisen we hemi jasem olsem ejen.

Ejen hemi save givimaot wan takis invois tu i go long kastoma from we hemi pem saplae, be oli mas mekem sua nomo se ejen hemi rejista mo saplaea hemi agri se bambae hemi no givimaot wan narafala invois blong sem samting ia we hemi saplaem. Afta bambae saplaea i mas givim wan invois folem balens blong sevis we oli givim be long semtaem invois blong ejen i no kavremap. Sipos i no gat eni agrimen long saed ia, bambae saplaea i mas givim wan invois from ful sevis.

Sipos saplaea hemi pruvum VAT long wan **invois beisis**, hemi mas pruvum VAT taemwe hemi kasem peimen long ejen o taem we hemi givimaot wan invois, hemia i dipen long weswan nao i kam fastaem. Sipos hemi folet **peimen beisis**, bambae hemi mas pruvum VAT taem we kastoma i mekem peimen i go long ejen.

Long tufala keis ia, hemi impoten se ejen hemi talemaot kwiktaem long saplaea wanem taem kastoma hemi mekem peimen blong helpem nomo saplaea blong hemi save pruvum VAT long stret riten period.

Peimen we ejen hemi kipim i stap go kasem taem we saplaea hemi provaedem olgeta sevis

Long olgeta keis olsem ia, saplaea bambae i talemaot long ejen hamas mane hemi mas pem. Afta bambae hemi didaktem komisen long amaon blong mane ia olsem we i stap long takis invois we saplaea i bin givimaot. Hemia i min se invois ia bambae hemi kam olsem wan invois we man we i pem guds o sevis nao hemi mekem, mo folet hemia, bambae tufala i nid blong askem fastaem apruvul blong Daerekta blong Dipatmen blong Kastoms mo Takis.

Rul blong pem VAT long ful saplae hemi semak olsem we yumi tokabaot andap, be problem nomo se rul blong saplaea blong pem takis hemi kam fastaem bifo hemi kasem peimen blong saplae ia.

Sipos hemi folet invois beisis, bambae hemi nid blong pem VAT long komisen we ejen hemi jasem long eli deit blong invois we hemi kasem long saplaea, o taem oli didaktem komisen long peimen. Sipos hemi folet

peimen beisis, bambae hemi kamaot long taem we oli didaktem komisen long hem.

- **Olgeta vaoja**

Loa blong VAT hemi no eksplenem gud wanem nao hemi wan vaoja, be folem eksplenesen we i kamaot long diksenari hemi talem se vaoja hemi “wan dokumen we oli save eksjensem blong karem guds mo sevis olsem wan pepa we i soem se peimen hemi tekemples finis o oli promes blong mekem peimen” mo “wan dokumen we i soem peimen long mane”.

Be sipos hemi long saed blong invois beisis, bambae VAT hemi kam andap taem oli yusum vaoja long wan prodak o sevis. Long taem ia tu bambae i gat VAT long komisen we ejen hemi jasem, hemia bambae i dipen long wiswan nao i kam fastaem, invois we saplaea i givim o taem we ejen i didaktem komisen blong hem long mane we hemi holem i stap.

Sipos hemi folem peimen beisis, saplaea bambae hemi mas pruvum VAT taem we hemi kasem peimen, afta we oli yusum vaoja. Eijen bambae hemi mas pruvum VAT long taem we hemi didaktem komisen.

Vaoja bambae hemi no wan takis invois

Hemia i minim se man we hemi risivim vaoja ia bambae hemi no save yusum blong kleim o eni input VAT from ol guds o sevis we vaoja ia hemi kavremap. Sipos ejen hemi givim wan takis invois we hemi seperet long vaoja, bambae i minim se oli mas pem VAT long ful valiu blong saplae long taem we oli givimaot invois ia. Bambae saplaea nao hemi mas pem VAT ia. Plante ejen oli gat fom blong vaoja o olgeta oda blong ol narafala fi. Tingting i stap se long plante keis we bambae yumi fesem bambae yumi save akseptem nomo blong oli yusum olsem ol vaoja.

Eksampol ia we mifala i soem andanit hemi stap givim yumi wan klia pikja blong olgeta infomeisen we i mas stap insaed long vaoja.

I Go Long: -----	Oda blong ol narafala fi	Hemi valid nomo sipos oli stampem deit
Vaoja ia i kavremap peimen blong rum blong silip mo/o sevis olsem we yu bin konfemen long refrens blong yu	Namba 2265	
PLIS GIVIM		
KASTOMA		
SAEN		
Vaoja ia hemi valid long sikis manis stat long deit we oli bin givim mo bambae oli akseptem nomo long valiu we i stap andap. Luk ol narafala ditel blong yusum vaoja ia.		

I Olgeta tua opereita we oli dil wetem ol pipol we oli flae i kam insaed long kaontri

Hemi tru blong talem se olgeta tua opereita we oli dil wetem ol pipol we oli flae i kam insaed long kaontri oli stap akt olsem wan wholsela insaed long turism industri, from se oli stap putum long ol pakej, ol difren kaen travel mo akomodeisen long wan tua we oli save salem. Tua opereita hemi save salem daerek tua ia o hemi save pas tru long wan ejen we i stap insaed long Vanuatu o long ovasi blong salem tua blong hem.

Olgeta sel insaed long Vanuatu

Bambae kampani i mas pem VAT long valiu blong Vanuatu Valufole gros seling praes blong tua. Eksjens reit we oli stap aplaem long taem we oli mekem sel nao bambae hemi soem wanem nao valiu blong hem. Level blong eksjens reit hemi no stap jenisim VAT nating, hemia i minim se man i no pem VAT folem net revenu we i kam bak long Vanuatu folem wan sel.

Sipos wan ejen we i stap long ovasi hemi salem prodak i go long wan kastoma, Vanuatu saplaea i mas pem VAT folem faenal praes we hemi salem prodak ia long hem i go long kastoma ia. Be sipos hemi salem i go long wan ovasi ejen we hemi i mekem wok blong hem wan blong mekem maket mo salem bakegen prodak ia, Vanuatu saplaea bambae i mas pem VAT folem praes we hemi salem i prodak ia long hem i go long ejen. Afta ejen hemi save rejista long saed blong VAT mo pem VAT folem valiu blong ameon we hemi adem bakegen long prodak ia.

Bambae bisnis hemi no save pem VAT folem komisen we wan ejen long ovasi hemi askem, be bambae hemi pem nomo sipos ejen ia hemi wan kampani we hemi rejista long saed blong VAT long Vanuatu. Tingting blong komisen long ples ia hemi long saed ia se bambae oli tekem folem praes we i gat VAT insaed o praes we VAT i no stap insaed. Sipos wan tua opereita i stap salem wan prodak tru long ejensi blong hemwan bakegen bambae i save gat sam kontrol long olgeta komisen. Be taem sel hemi tekemples tru long wan indipenden ejensi, lukluk i stap se bambae i save gat komisen i kamaot folem praes we i gat VAT insaed.

Olgeta ovasi marketing kost

Sipos olgeta kost ia hemi blong olgeta sevis we oli mekem insaed long Vanuatu, olsem kost blong printing we i tekemples insaed long Vanuatu, bambae oli mas jasem VAT long hem. Be sipos hemi blong olgeta sevis we oli ranem long ovasi, olsem kost blong printim mo distributim ol prodak long ovasi, bambae oli no save jasem VAT long hem.

Olgeta promosenal fand

Olgeta fand we oli sendem i go ovasi blong sapotem olgeta marketing aktiviti bambae i no gat VAT long olgeta hemia sipos olgeta sevis ia oli ranem olgeta aotsaed long Vanuatu mo wan man we hemi no rejista nao hemi stap ranem.

J Olgeta jeneral sel ejen

Olgeta jeneral sel ejen (JSE) oli ripresentem olgeta prinsipol we oli stap long ovasi mo oli akt olsem ol masta ejen insaed long Vanuatu from we oli stap salem ol fasiliti blong ovasi long bihav blong olgeta prinsipol ia. From se oli stap ranem kaen sevis olsem ia, oli save askem blong kasem wan maketing fi mo wan ova-raeda komisen.

From se olgeta sevis we JSE hemi stap saplaem i stap go long wan man we hemi no stap liv insaed long Vanuatu mo we hemi bin stap liv aotsaed long Vanuatu long taem we oli bin mekem sevis ia, bambae oli no save jasem VAT long olgeta fi mo komisen blong olgeta.

I save gat sam taem we JSE hemi masta ejen blong wan man we hemi stap liv insaed long Vanuatu. Long kaen keis olsem ia, eni fi o komisen we JSE hemi risivim bambae i mas gat VAT long hem.

K Pasenja Transpot

Ea mo Si transpot

• Intanasonal

Olgeta trip i go long ovasi oli sero-reited, we i minim se kastoma bambae hemi no save pem VAT long hem.

Olgeta kastoms konsesen we oli aplaem long olgeta bokis, basket mo ol narafala pesonal samting we man i karem i kam insaed long Vanuatu bambae i gat VAT long hem. Sipos olgeta samting ia i go bitim konsesen ia, bambae i mas gat VAT long mane we oli jasem folem kastoms valiu blong olgeta guds hemia blong saed blong diuti, olsem praes we oli pem olgeta guds ia long hem, mo kastoms diuti we pasenja i mas pem long olgeta guds ia.

- **Kampani blong rentem trak**

Olgeta step blong folem taem we kampani hemi kasem pat o ful peimen blong ol buking i stap long sekzen blong buklet ia we taetol blong hem hemi “*Olgeta travel ejen - Olgeta peimen*”, mo sekzen ia i tokabaot tu olsem wanem blong yusum olgeta vaoja. Andap long hem Seksen ia “*Olgeta travel ejen*” hemi kavremap fasin blong pruvum VAT bitwin ejen wetem saplaea.

- **Ol fi long saed blong buking**

Olgeta fi we kampani hemi jasem long wan man we hemi kam blong bukim wan trak bambae i mas gat VAT long hem taem we kampani i jasem fi ia.

- **Olgeta ekses**

Olgeta ekses we wan kampani hemi jasem blong kavremap insurens, olsem ekses blong 25,000 Vatu blong protektem aksiden taem we olgeta draeva oli no kasem 25 yia yet mo kaen ekses olsem ia bambae kampani hemi rifandem bak fulwan sipos man ia i karem bak trak be i no gat damej long hem. Kaenkaen sistem olsem ia hemi olsem wan bond. Bambae VAT hemi no kavremap olgeta ekses, nomata we bambae i gat VAT long eni pat o evri pat blong ekses ia sipos i gat damej.

L Akomodeisen

Olgeta step blong folem taem we kampani hemi kasem pat o ful peimen blong ol buking i stap long sekzen blong buklet ia we taetol blong hem hemi “*Olgeta travel ejen - Olgeta peimen*”, mo sekzen ia i tokabaot tu olsem wanem blong yusum olgeta vaoja. Andap long hem Seksen ia “*Olgeta travel ejen*” hemi kavremap fasin blong pruvum VAT bitwin ejen wetem saplaea.

Jeneral

I mas gat VAT long ol akomodeisen insaed long olgeta hotel, hostel, motel, olgeta boding

haos, olgeta ples blong kamp mo ol narafala ples moa we ol pipol oli stap silip long hem.

Taem blong saplae

Taem blong saplae bambae hemi dipen nomo long wanem kaen wei nao yu jusum blong pruvum VAT long hem.

Jasem VAT

Tingting i stap se plante long olgeta hotel, motel mo ol narafala ples we ol pipol oli stap rentem blong silip bambae oli rejista long saed blong VAT. Hemia nao hemi wan eksampol we i soem long yu olsem wanem blong pruvum VAT long ol defren situeisen we yu save feisem.

	VT
Rent blong motel	9,000
Plas 12.5% VAT	1,125
Guest i pem	10,125

- Sipos guest hemi bukim motel i go stret wetem ona blong motel, bambae ona blong motel ia i winim 10,125 Vatu mo hemi mas pruvum VAT blong 1,125 Vatu.
- Be sipos guest hemi bukim motel ia tru long wan ejen mo hemi pem fastaem long wan ejen:

	VT
Guest i pem ejen (Fi plas 12.5 % VAT)	10,125
Ejen i tekemaot 10% komisen long fi	1,013
Plas 12.5% VAT	<u>127</u>
	<u>1,140</u>
Total mane we hemi mas pem i go long ona blong motel	8,985

Sipos hemi pem i go daerekt long ona blong motel

Amaon blong mane we wanwan long olgeta ia (ona blong motel, ejen mo VAT Ofis) bambae oli semak nomo, be ona blong motel hemi kipim 8,985 Vatu mo hemi pasem 1,140 Vatu i go bak long ejen.

M Ol narafala samting

Kredit kad

Hemi tru blong talem se plante wok mo bisnis we i stap tekemples insaed long travel mo turism industri oli stap yusum plante olgeta kredit kad. Nomata we olgeta transaksen blong olgeta kredit kad oli kam long plante difren kaen wei, long nomol fasin blong wok bambae oli mas jasem VAT long taem we oli mekem sel blong kredit kad. Olgeta sel ia oli semak nomo olsem olgeta kas sel. Taem yu stap kalkuleitem VAT aotput takis blong yu blong wanwan period, yu mas putum insaed tu total valiu blong olgeta kredit kad sel vaoja.

Olgeta fi we olgeta kredit kad kampani oli stap jasem folem yus blong kredit kad sevis oli ekseempt long VAT from se hemi wan faenansol sevis.

Olgeta kredit kampani ia bambae oli tekem sevis fi blong olgeta long ful ameon blong transaksen (we i kavrempat tu pat blong VAT insaed long transaksen ia).

Olgeta samting we oli pem long diuti fri

Hemi tru blong talem se olgeta diuti stoa oli stap mekem sem wok nomo olsem wan ritel stoa mo wan ekspot kampani. From se VAT hemi no kavrempat olgeta guds we oli stap blong ekspotem, olgeta pasenja we oli stap travel i go aot long kaontri mo oli pem olgeta diuti fri guds bambae oli no pem eni VAT long olgeta guds ia. Be hemi impoten blong luk save long ples ia se sipos turis ia hemi pem VAT long ol narafala guds we hemi pem long nomol ritel stoa, bambae hemi no save askem blong oli rifandem ol mane ia we oli spendem long VAT blong ol narafala guds ia.

Blong moa infomeisen o help

Sipos yu wantem kasem moa help long saed blong ranem olgeta administreisen wok blong VAT insaed long bisnis blong yu, yu save kontaktem VAT Ofis insaed long Dipatmen blong Kastoms mo Inlan Reveniu. Bambae oli glad oltaem blong helpem yu.